

**Zeitschrift:** Schwyzerlüt : Zyschrif für üsi schwyzerische Mundarte

**Band:** 25 (1963)

**Heft:** 1

**Artikel:** D Muetersproch

**Autor:** Wirz, Pauline

**DOI:** <https://doi.org/10.5169/seals-190114>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 24.08.2025

**ETH-Bibliothek Zürich, E-Periodica, <https://www.e-periodica.ch>**

es guets Gspüri. Das chäche, gsunde Pfyffeholz, wo under de Dichter wachst, wird nit verschüpft, me luegt derzue, me hüetet dä läbig Grüenhag und sorget derfür, ass d Schössli nit absärble.

D Erziehigsdiräktion z Liestel het e zuerverlässige Gärtner dinget und das isch d Literatur-Kommission. Dört drinne sorget mit Lyb und Seel der bekannt Mundertdichter Karl Loeliger für d Muetersproch. — Me cha s Byspil vo sonere flotte Regierig nit höch gnue yschätze. Däm seit me gluegt und gsorget. Z Liestel gits drum keini Hindertürli. Wenns e Dichter guet meint i syne Schrifte, wird er aglost, me gryft em under d Arme und loht ne nit loh verbittere. Säget, liebi Läser, gits es schöners Byspil as das vo Liestel? Do drinne lyt gwüss au s Gheimnis, worum me im Baselbiet es flotts Schärli Schriftstellerinne und Schriftsteller het, wo sälb Muetersproch, wo em Traugott Meyer so heilig gsi isch, wyters träge. D Pauline Wirz ghört au zu dene, wo dürfe derzue stoh und drum sell si by «Schwyzerlüt» es Plätzli a der Sunnen übercho.

Bärn, im Wymonet 1962

Eue Redakter  
*Beat Jäggi*

## D Muetersproch

Wenn i so für mi hi über eusi Muetersproch nochedänk, chunnt mer all das Volkslied in Sinn, wo afot: «Was isch doch au das Heimelig, s isch son es artigs Wort.» Grad son es Wort isch «d Muetersproch», so artig und heimelig. My ganzi Chindheit lyt drinn, und alli Erinnerige sy verwäbt und verchnüpft mit der liebe Mundart, der Muetersproch.

E, wie ischs albe schön gsi, wo eusi Baselbieter-sproch, in jeder Talschaft e chly anderscht, no rein und luter tönt het. Sälbmol isch euses Schwyzer-

dütsch no süferli uff d Kantön verteilt gsi, und numme do und dört het si es Bärn- oder Züridütsch, es Aargauere oder Ürnere, vo Uslandsproche nit zrede, z Basel unde oder bi eus im Baselbiet verlore und umkehrt. Men isch halt meischtens am Geburtsort blybe chläbe und numme us em Kanton furtzoge, wenn sälb nit anderscht gangen isch. Aber hüt isch das alles anderscht worde, die reinschi Völkerwanderig het ygsetzt, au bi eus, in eusem schöne Baselbiet.

Sicher kei Schuelklass, wo me nit allergattig verschi-deni Mundarte durenander ghört und wenn derno der Herr Lehrer oder d Lehrere non e Graubündner isch, so chunnts au e so use, wie sälbtmol, won i no as Schuelpflägere in ere erschte Klass zueglost ha, wie vom Öpfelgünne brichtet worden isch. D Lehrere het e schönen Öpfelbaum uff d Wandtafele zeichnet mit ere lange Leitere dra und het de Chinder verzellt, ass jetz derno der Bur mit em «Pflückchorb» chömm und do bi der Leitere d Sprossen ufgöng. Derby het si mit eme Stäcke uff die Sprosse zeigt. Aber es urchigs baselbieter Burechind het in d Klass usegrüefe: «Fräulein, das sy keini Sprosse, das sy Spränzel und es bar Chind hai durenander gschwäzt und me het Wörter wie Chrätte, günne und Sack über d Achsle hänke chönne ghöre. Ganz verdutzt het d Graubündnere d Chinder agstunt und het gsait:

Bi uns säget mer halt so und jetz säget der halt au Sprosse, gellet! I bi dogstande und ha dänkt: «Wo-woll, das isch jetz no, wie mues das usecho mit euser schöne bodeständige Baselbietersproch.» Wo do d Schuel usgsi isch und d Chind d Schuelstube grumt gha hai, han i der Lehrerin zuegsproche, ass si ämmel jo euse Chinder die olte urchige Mundartusdrück vom Baselbiet nit soll äwag neh. Nu, si het mers derno versproche.

Es andersmol bin i näben ere Hüserreihe mit Vor-

gärtli dure gspaziert. Zwe Drittiklässlerbuebe hai uff em Strössli vorzue gschuttet, und will d Balle durs offe Gartegätterli in Garte yne grugelet isch, het der-eint, e chreftige Baselbieterbueb zu sym Kamärad grüefe:

«Tue doch emol s Töri zue.» «Jä, saisch du dem Töri», han i der Fritz, won i ganz guet kennt ha,

gfrog, bi eus sait me dem doch Türli oder Gätterli.»

«Dä sait au eso», het er mer druf prompt ummege.

«Das isch e Bärner» han i gmacht, «d Bärner säge Töri, aber e rächte Baselbieter sait Garteturli» . . . «E das isch doch glych, Töri oder Türli, d Hauptsach isch, ass jetz zue isch, so chönne mer schutte.»

Jä, so ischs hüt mit euser Muetersproch. Das isch wie gsait vor sächzg, sibtzg Johre no anderscht gsi und i weiss no guet, wien i allwág as chlynis Maiteli d Baselbietersproch, so urchig wie my Mueter, wo se us ihrem Dörfli ob em grosse Wald in euses Huus brocht het, geschwäztzt ha. Wenn i albe zu myne Kamärdli gsait ha: Lauf fryweidli, flieh oder sältsch, so hai si gfrog, was das syg. I has natürlig au nit gwüssst, aber wenns doch my Mueter sait, han i dänkt, so ischs ämmel sicher öbbis.

Won i do in die erschti Klass cho bi und stolz mit myner Ambalaschschueltäsche mit de gstickte farbige Blueme druff, in die grossi Schuel cho bi, han is Gfell oder au s Ungfell gha, wie mes neh will, ass i mit eme Maiteli im ene schöne Röckli und eme läderige Schuelsack am Buggel, es Stück wyt in d Schuel der glych Wág gha ha. Es het basleret, so het es mer sy Sproch äxpliziert und s het mer alles an dem Maiteli gar ne grüslig noble Ydruck gmacht.

Aber es het all öbbis an mir uszsetze gha, eimol isch em my Mantel nit sufer gnueg gsi und s andermol isch z Züpfli z wenig schön gflochte gsi.

So sy mer ämmel au emol us der Schuel zäme d Chillegass ab bis uff d Schlyfibrugg cho und hai zäme gchiflet. Es het zue mer gsait:

«Du saisch all Solz und cholt und Wold und derby  
sait me doch Salz und chalt und Wald, weisch», hets  
wytergmacht:

«Weisch, wenn me in die grossi Schuel goht, cha me  
rächt schwätze...»

Do drab bin i heilos daub worde, ha mys Schuel-  
kamärdli an den Achsle packt und has agschroue:

«My Mueter sait Solz und cholt und Wold, und my  
Mueter isch ämmel vill grösser as du und weiss das  
dänk besser», han em d Zungen usegstreckt, bi gegen  
euses Huus gsprunge und han em vo dört us no wel-  
len e langi Nase mache, aber es isch scho wyter-  
gloffe.

Hüt dänk i mängischt, wenn mer das Gschichtli  
wider in Sinn chunnt, «han is ächt sälbtmol scho  
gspürt, ass i emol son e Freud an euser Muetersproch  
haig».

## My Mueter

Wenn mir Chinder vor Johre alben am Morge ver-  
wache sy, het dunde in der groosse Stuube der  
Wäbstuel scho lang kläbberet. Mer sy deis gwohnt  
gsi. Drum sy mer au alli älleigge uufgstande und  
hain is sälber agleit. Enzig mir Hääfelischüeler het  
d Schweschter der Rock und der Schurz hindenabe  
müesen ytue. Am Summer, wenns heiter gsi isch,  
hets nie ghabberet dermit, aber am Winter, wenns  
am sibeni no ganz feischter gsi isch und mer eusi  
Chleider chuum gfunde, gschwygen alegge hai  
chönne, derno hai mer druuf gwartet, bis der Wäbb-  
stuel stillgstanden isch und mer hai schönne rüefe:  
«Mueter, bring s Liecht uufe, mer wei uufstoh.» Jetz  
het d Mueter d Pasimänterlampe abghänkt und isch  
mitere s geech Stuubestägli uuf in die oberi Stuube  
cho, het is e guete Tag gäb is Gott agwunsche und